

Na vijita al Stont de Ciampedel

Dai 25 de jugn duc podarà jir a veder chesta neva seziun del Museo Ladin che sarà averta dal lunesc a la sabeda da les 5 a les 7 da sera e de jebia ence dò cena

Turism e cultura - En lunesc ai 25 de jugn a Ciampedel vegnarà avert a la jent la neva seziun del Museo ladin de Fascia "L Stont".

L veie Stont de Ciampedel per egn l'è restà arbandonà, l'è ence risià de esser batù jù, enveze de gra a l'aministrazion de l'ex capocomun Renzo Valentini, ai Scizeres de Fascia e a la Provinzia Autonoma de Trent l'è stat fat fora e restaurà, ai 6 de mé del 2018 l'è stat benedì e ades l'è dut vertech perché la jent posse l veder ence daite. L se troa vejìn a la veia mèlga, te strèda Pent de Sera che l'è chela che rua ja la forenada de Rodela.

L'era stat fat aló percheche n'outa, zacan, sot l Stont no l'era più nia, l'era demò pré e la Veisc, donca l'era l post più adatà olache i omin podea jir a emparèr a sbarèr e mirèr l tulac, zenza pericol per nesciugn.

Ades, chest fabricat ciarià de egn e de storia, l'è doventà na picola seziun del Museo Ladin de Fascia, dedichèda al Comandant di Scizeres de Fascia endèna la Veres de Liberazion, l Major Antonio "Tone" Rizzi da Vich.

Enstadì, dant che l Stont vegne avert, l'è stat endrezà na scontrèda olache l pascionà de storia Gabriele Valentini - che anter l'auter l'è stat un di prumes a se n'adèr de la valuta de chest fabricat da n'outa - l'è fat na vijita ensema con la responsabola e la operadores del Museo Ladin, Daniela Brovadan, Mara Vadagnini e Franca Chiocchetti, e con Annelise Vian, che la rejarà la mostra del Stont chest istà. Gabriele Valentini à rejonà de storia e ence de vèlch marevea e Daniela Brovadan à prejentà i materiai metui fora te chesta seziun del Museo.



L'alestiment del Stont con depenc, tabeles e èrc. (foto: Davide Perbellini)

N'outa chest picol e scempie fabricat, daite l'era vet ajache l vegnia durà per tegnir la èrmes, ades enveze l'è na picola mostra per descorig n auter toch de storia de noscia val e noscia jent, chela leèda ai Scizeres e a la veres di Fascegn.

Se pel veder foto de copies de depents di Scizeres te la Veres contra i Franzouse, na foto de na Messa Noela olache l'è bel veder la bandiera col Sacro Cher e dapò da marevea, la foto storica che moscia apontin coche l'era la spersa dedant al Stont, olache l'era i doi tulaces, un de cà e un de là da Veisc, e, vardan fora per la fonestres, ence ades, se enten benon olache i Scizeres cognea mirèr.

Te na vedrina l'è stat metù fora èrc e documents, anter l'auter la domana

ofizièla de poder fèr sù l Stont, la domana del Comun de Ciampedel a la Frazion de Cianacei per didament en legnam per fèr sù chest fabricat.

Zis bel da veder l'è l tulac de legn del 1898 del "giubileo" del Kaiser Franz Josef, n veie schiop a "avancarica", na patrona troèda sot l fon, e semper da marevea, la fascia, una de cheles per la bandieres, originèla de la di che l'è stat benedì l Stont del 1905.

Chesta del Stont de Ciampedel l'è na picola seziun de Museo Ladin de Fascia, aboncont l'è na gran valuta per nos fascegn, ajache la ne dèsc deretorn n toch de istoria de noscia jent, chela de nesc omin, i Scizeres, che à combatù per defener chesta noscia maraveosa val, che fajea pèrt del Tirol e de l'Imper Austro Ungarich!

Per chi che aessa piajer de veder la mostra, meton n consaputa che l Stont l restarà avert dut istà, dai 25 de jugn ai 8 de setember, dal lunesc a la sabeda, da les 5 a les 7 da sera, de domenia l sarà serà.

De jebia l sarà avert ence dò cena, da les 9 a les 11, e sarà l vize comandant di Scizeres de Fascia, l jon Manuel Adami che podarà compagnèr la jent te n zis bel viac te la storia de noscia jent. Dai 4 de messèl ai 5 de setember, duta la setemènes de mercol vegnarà fat na "vijita vidèda" col storich Gabriele Valentini, per chesta ge vel se encinuèr al Museo Ladin de Fascia.

Siede duc envié a veder chest storich fabricat e a ge fèr a saer ai ghesé che l'è chesta picola e preziosa seziun de nosc museo fascian. (av)



A man cencia Gabriele Valentini e te mez Annelise Vian, ensema con Mara Vadagnini, Daniela Brovadan e Franca Chiocchetti del Museo Ladin de Fascia, endèna la vijita per descorig miec la seziun del Stont a Ciampedel.